

Kenyataan Media Berkaitan Kerajaan Komited Bantu Rakyat Malaysia Mangsa Sindiket Penipuan Pekerjaan Luar Negara

By : Media Statement

Date : 20/09/2022

KENYATAAN MEDIA YAB PERDANA MENTERI

KERAJAAN KOMITED BANTU RAKYAT MALAYSIA MANGSA SINDIKET PENIPUAN PEKERJAAN LUAR NEGARA

Kerajaan komited membantu dan menyelesaikan isu rakyat Malaysia yang terkandas di luar negara, ekoran sindiket penipuan kerja seperti yang disuarakan oleh Pertubuhan Keprihatinan Jenayah Komuniti Malaysia (MCCC) dan Pertubuhan Kemanusiaan Masyarakat Antarabangsa Malaysia (MHO).

Menteri di Jabatan Perdana Menteri (Tugas-Tugas Khas) telah pun mengadakan perjumpaan dengan Presiden MCCC, Tan Sri Musa Hassan dan Setiausaha Agung MHO, Datuk Hishamuddin Hashim serta ahli keluarga mangsa-mangsa sindiket bagi mendapatkan maklumat terperinci, untuk dibentangkan dalam Mesyuarat Jemaah Menteri esok.

Saya ingin tegaskan bahawa Kerajaan amat prihatin dan mengambil serius mengenai nasib rakyat Malaysia yang terkandas di beberapa negara seperti di Laos, Myanmar, Thailand dan Kemboja.

Usaha-usaha sedang dilaksanakan melalui semua saluran yang ada dan Kerajaan akan memastikan mereka dibawa pulang dengan selamat.

Pada masa yang sama, saya menasihatkan seluruh Keluarga Malaysia agar sentiasa berhati-hati dan berwaspada dengan tawaran pekerjaan di luar negara.

Keluarga Malaysia perlu menyemak kesahihan tawaran kerja di luar negara melalui Wisma Putra, bagi mengelakkan diri daripada terjebak menjadi mangsa sindiket penipuan pekerjaan.

#KeluargaMalaysia

#BekerjaBersamaRakyat

DATO' SRI ISMAIL SABRI YAAKOB

20 September 2022

Copyright of the Prime Minister's Office Official Website

Source: <https://www.pmo.gov.my/2022/09/kerajaan-komited-bantu-rakyat-malaysia-mangsa-sindiket-penipuan-pekerjaan-luar-negara/>